



Inatsisartuni ilaasortaq Aleqa Hammond, Siumut  
TAMASSA

**Suliniutit angisuunut tunngatillugu § 37-mut tunngasutut apeqqut nr. 2012-279-  
imut akissutit**

7. december 2012  
Sagsnr. 2012-060449  
Dok. Nr.

Inatsisartut suleriaasianni § 37, imm. 1 naapertorlugu suliniutit angisuunut tunngasunik  
Naalakkersuisunut ataaniittunik apeqqutilliisimavutit.

Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: lsiin@nanoq.gl  
www.nanoq.gl

**1) Naalakkersuisut kikkut selskabet maannakkoqqinnaaq  
isumaqatiginninniarfigaat?**

**Akissut:**

Siunissap qaninnerpaap iluani atuinissamik akuersissummik qinnuteqaateqareersunik imaluunniit qinnuteqaateqarnissaannut naatsorsuuteqarfiusunik maannakkut tallimanik suliniuteqartunik ingerlatseqatigiiffeqarpoq. London Miningip saviminissarsiorfimmik suliniutaata saniatigut pingaarnertut tassaapput Killavaat Alannguanni (Kringlernemi) aatsitassanik qaqutigoortunik atuinissamik Tanbreezip qinnuteqaataa, kiisalu Qeqertarsuatsiaat eqqaanni korundeqarfimmik (rubineqarfimmik) atuinissaq pillugu True North Gemsip qinnuteqaataa. Taakku saniatigut qaammatit tulliuttut 12-it iluini Kalaallit Nunaata Tunuata Avannaani Citronenfjordip eqqaani aqerloqarfiullunilu zinkeqarfimmut Ironbarkimit atuinissamut akuersissut pillugu qinnuteqaat takkutissagunarpoq. Kiisalu Kuannersuit (Kvanefjeldetip) eqqaanni aatsitassaqaarfeqarpoq, pinngoqqaatinik radioaktiviusunik annertusisamik akoqassuseq pissutigalugu ukiup tulliata iluani aatsitassaasup atorneqarnissaa pillugu qinnuteqaataasup naatsorsuutigineqarsinnaassanera nalorninartuunerulluni.

**2) Naalakkersuisut oqarput Suliniutinut Angisoorsuarnut inatsisissaq maanna 6.-  
7. December akuersissutigineqartariaqartoq utaqqisoqarmat. Kikkut utaqqippat?**

**Akissut:**

Inatsisartut ataatsimiinnerini marlunni suliniutinut angisuunut atugassiat oqaluuserineqarsimapput. UPA 2012-imi suliniutinut angisuunut nalunaarusiaq, suliniutinut angisuunut inatsisissamut siullertut allaqqaakkamik takussutissiatut ilanngussaqaarfigalugu Naalakkersuisut saqqummiuppaat. Oqaluuserinninnerup taassuma kingorna suliniutinut angisuunut inatsisissamut allaqqaagaq nutaaq tusarniaassutigineqarpoq. Tusarniaassut tunngavigalugu UKA 2012-imut suliniutinut angisuunut inatsisissatut siunnersuut Inatsisartut saqqummiuppaat. Maannakkut inatsisip oqaluuseralugu suliarinissaa pingaartuuvoq, taamaalilluta silarsuarmut

avatangiisimut suliniutinut angisuunut sinaakktissatut piumasaqaatit tamarmiusut nalunaarutigisinnaalissagatsigit. Kinguartitseqqinnerit Kalaallit Nunaata tutsuiginassusaanik ajortisaassapput, erseqqissunillu tamanillu takusassaqarfigisanik sinaakktissatut atugassaqarfiusutut Kalaallit Nunaat aningaasaliiffigisassatut nunatut upperinartuunngitsutut isumaqarfigineqartilissallugu.

**3) Naalackersuisut isumaqarpat Suliassanut Angisoorsuarnut inatsisissaq qanoq sukkatigisumik sulissanersut selskabersuit kisimiillutik aaliajangissagaat?**

**Akissut:**

Naagga.

**4) Inuussutissarsiornermut ataatsimiititaliap Inatsisartut ukiakkut 2012-mi ataatsimiinnerminni suliartik naammasisinnaanngikkaat erseqqissusiortoqarpoq, sooq Naalackersuisut tamanna upernaamut suliarineqarsinnaanissaa pinngitsoortinniarlugu taamat assoroortigaat?**

**Akissut:**

Inatsisartut Siulittaasoqarfia oqaluuserisassanik nammineq saqqummiussisarpoq.

**5) Ammasumik ingerlatsinertut aammalu innuttaasunik akuutitsinertut Naalackersuisut taajumavaat inatsisissaq massa selskabersuarnit inatsisartut qanoq sukkatigisumik sulissanersut aaliangeraat?**

**Akissut:**

Suliniutinut angisuunut inatsimmut tunngatillugu Naalackersuisut ammalluinnarsimapput. 2012-imi Upernaakkut Ataatsimiinnermi oqaluuserineqarnissaa sioqqullugu suliniutinut angisuunut nassuiaat tusarniaassutigineqarpoq. Taamatutaaq 2012-imi Ukiakkut Ataatsimiinneq sioqqullugu suliniutinut angisuunut inatsiserpiaamut tunngatillugu atugassat tusarniaassutinut nittartakkami kikkut tamarmik takusaqarnissaminut periarfissaqarsimapput, soorlulusooq tusarniaanermut akissutit tamarmik tamanut saqqummiunneqarsimallutik. Tamakku saniatigut namminersornermut inatsisip kingornatigut inatsisissatut siunnersuutini tusagassiuutini naqitani soorlulusooq elektroniskiusuni oqaluuserineqarnerpaasimagunarpoq.

**6) Suliassanut angisoorsuarnut inatsisissaq aatsaat martsimi akuersissutigineqassagaluarpat suna nunatsinnut sunniutigissavaa?**

**Akissut:**

Imaaliallaannartumik sanaartornermut aningaasartuutaasut qanoq aningaasaliiffigineqarnissaannut London Miningip isumaqatigiissuteqarniarnermini ajornartorsiulernissaa kingunerissavaa. Aningaasaliissutini taama annertussuseqartuni sanaartugassatut suliniummut tunngavigisaasutut atuuttuusut aningaasaliisartut

akuersissuteqannginnerminni ilisimarusuppaat. Kinguartitsoqarnerani suliniutip piviunngortissaneranut imaluunniit piviunngortissannginneranut qanoq pingaaruteqartiginersoq Naalakkersuisut akissuteqarfiginissaanut periarfissaqarfiginngilaat.

Taamaattorli suliniutip piviunngortissaneranut imaluunniit piviunngortissannginneranut piffissamut tunngasut ilaannikkut pingaaruteqartarneri ilisimatitsissutigineqassaaq. Ittoqqortoormiit avannaq-kitaatungaanni molybdæneqassutsimik atuinissamik akuersissuteqarnissamut qinnuteqaatip suliarinerata nalaani avatangiisinik misissuinerit inernerisa ilaat allaniit nalornissutigineqarput. Taamanikkut DMU (maanna DCE) avatangiisinik misissuinerit ilaannut atatillugu akerliliissuteqarsimangillat. Taamaattumik avatangiisinik misissuinerit ilaannik taakkuninnga oqartussaaffeqarfik kiffaangissuseqartoq nutaaq misissuisussanngorpoq. Taakku inerneriliissutit saqqummiuteqqaakkat eqqortuusut uppersarivaat. Taamaaliornerilli atuinissamik akuersissutip nalunaarutiginnissaata kinguarterneranik nassataqarpoq, aningaasaqarnermilu ajornartoorfiup nalaaniilluni, taamaalilluni molybdænip akia affaa sinnerlugu nalikillilluni. Taamaattumik suliniut unitsiinnarneqarpoq.

**7) Naalakkersuisut isumaqanngillat inatsisartut eqqissillutik inatsisillortariaqartut ilami naalakkersuisut siulittaasuata nunatta inuia tunngavilersuummini taannginnamigit kisiannilli utaqqisoqarnera kisiat tunngavilersuutigimmagu?**

**Akissut:**

Apequt 2-mut akissut takuuk.

Inussiarnersumik inuulluaqqusillunga



Ove Karl Berthelsen



23. november 2012

Inatsisartut suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqut:**

- 1) Naalakkersuisut kikkut selskabet maannakkoqqinnaaq isumaqatiginninniarfigaat?
- 2) Naalakkersuisut oqarput Suliniutinut Angisoorsuarnut inatsisissaq maanna 6.-7. December akuersissutigineqartariaqartoq utaqqisoqarmat. Kikkut utaqqippat?
- 3) Naalakkersuisut isumaqarpat Suliassanut Angisoorsuarnut inatsisissaq qanoq sukkatigisumik sulissanersut selskabersuit kisimiillutik aaliajangissagaat?
- 4) Inuussutissarsiornermut ataatsimiititaliap Inatsisartut ukiakkut 2012-mi ataatsimiinnerminni suliarfik naammasisinnaanngikkaat erseqqissusiortoqarpoq, sooq Naalakkersuisut tamanna upernaamut suliarineqarsinnaanissaa pinngitsoortinniarlugu taamat assoroortigaat?
- 5) Ammasumik ingerlatsinertut aammalu innuttaasunik akuutitsinertut Naalakkersuisut taajumavaat inatsisassaq massa selskabersuarnit inatsisartut qanoq sukkatigisumik sulissanersut aaliangeraat?
- 6) Suliassanut angisoorsuarnut inatsisissaq aatsaat martsimi akuersissutigineqassagaluarpat suna nunatsinnut sunniutigissavaa?
- 7) Naalakkersuisut isumaqanngillat inatsisartut eqqissillutik inatsisiliortariaqartut ilami naalakkersuisut siulittaasuata nunatta inuia tunngavilersuummini taannginnamigit kisiannili utaqqisoqarnera kisiat tunngavilersuutigimmagu?  
(Inatsisartuni ilaasortaq, Aleqa Hammond Siumut)

**Tunngavilersuut:**

Siumumi isumaqarpugut nunarput inuilu suliani tamani qitiutinneqarluinnartariaqartut. Selskabersuit avataaneersut nunatta inatsisai piumasaqaataalu ataqqissavai, kisianni maannakkoqqissaq naalakkersuisooqatigiit killormuanik ingerlatsipput, tassalu selskabersuit utaqqimmata inatsisartut tukummattariaqarput allaat immikkut ittumik aggersarneqartariaqalerput qarsupittumillu sulisinneqarlutik.